

000000

- राष्ट्रीय जनतांत्रिक गठबंधन-एनडीए एक राय ऊं नरेन्द्र मोदी ने नेता चुण्यो-मोदी राष्ट्रपति ऊं मुलाकात कर र सरकार बणावण रो दावो पेश कीनो।
- भारतीय जनता पार्टी रा आला नेता नरेन्द्र मोदी दीतवार ने लगातार तीजी दफा प्रधानमंत्री ओहदा री शपथ लेवेला-शपथग्रहण समारोह राष्ट्रपति भवन मांय सिंज्यां छह बज्यां व्हेला।
- रिजर्व बैंक द्विमासिक मौद्रिक नीति समीक्षा मांय रेपो रेट साढे छह फीसदी रा लेवल माथे ई राखण रो फैसलो कीनो।
- चिकित्सा अर स्वास्थ्य मंत्री गजेन्द्र सिंह खींवसर नामी मसाला कंपनियां रा असुरक्षित मिल्या मसालां ने तुरत सीज करण रा हुकम दीना।

0000

राष्ट्रीय जनतांत्रिक गठबंधन-एनडीए एक राय ऊं नरेन्द्र मोदी ने नेता चुण लीनो है। नई दिल्ली मांय एनडीए संसदीय दल री आज व्ही मीटिंग मांय भारतीय जनता पार्टी रा आला नेता राजनाथ सिंह मोदी ने एनडीए रा नेता चुणबा रो प्रस्ताव रख्यो जिण री एनडीए मांय शामिल सगळी पार्टियां रा नेता हिमायत कीनी। तेलगुदेशम पार्टी रा नेता चंद्रबाबू नायडू कह्यो के नरेन्द्र मोदी री अगुवाई मांय एनडीए सरकार लारला दस साल मांय केई खास काम कीना। जनता दल युनाईटेड रा अध्यक्ष अर बिहार रा मुख्यमंत्री नीतीश कुमार कह्यो के सगळा नरेन्द्र मोदी री अगुवाई मांय मिल र काम करेला। मीटिंग मांय मोदी कह्यो के एनडीए मांय शामिल पार्टियां राष्ट्र प्रथम री भावना सागे काम करण वाळां रो गठबंधन है। वे कह्यो के लारला दस साल मांय एनडीए देश ने नुवी ऊंचाइयां माथे ले जावण रो काम कीनो है।

000

भारतीय जनता पार्टी रा आला नेता नरेन्द्र मोदी आज राष्ट्रपति द्रौपदी मुर्मू सागे मुलाकात कर र सरकार बणावण रो दावो पेश कीनो। ई पाछे राष्ट्रपति वां ने सरकार बणावण रो न्यौतो दीनो। नरेन्द्र मोदी दीतवार 9 जून ने लगातार तीजी दफा प्रधानमंत्री ओहदा री शपथ लेवेला। शपथ लेवण रो जळसो राष्ट्रपति भवन मांय सिंज्या छह बज्यां राख्यो जावेला। आज एन डी ए संसदीय दल री मीटिंग रे दौरान भाजपा रा नेता प्रल्हाद जोशी आ जाणकारी दीनी। राष्ट्रपति द्रौपदी मुर्मू मोदी अर वां रा मंत्रिमंडल रा सदस्यां ने शपथ दिरावेला। नेपाल रा प्रधानमंत्री पुष्प कमल दहल 'प्रचंड' शपथ ग्रहण समारोह मांय शामिल व्हेला।

00000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारु आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। माली अपराधां मांय अब आपराधिक विश्वासघात, जालसाजी, हवाला लेन-देन, विपणन धोखाधड़ी अर व्यक्तियां या बैंकिंग अर वित्तीय संस्थानां सागे दगो करण री योजनावां सरीखा अपराध ई शामिल करी ज्या है। गर अपराध रे कारण जिदंगी रो नुकसान व्हे तो अपराधी ने मौत री सजा या

उम्रकैद री सजा दी जा सके है। ई सागे ई कम ऊं कम दस लाख रूप्या रो जुर्मानो ई लगायो जावेला। ई रे अलावा मिल र अपराध करण मांय मदद करण वाळां सारू ई सजा देवण रो प्रावधान करी ज्यो है। नुवा प्रावधानां रे मुजब घोषित अपराधियां री सम्पत्ति ई जब्त करी जा सकेला। भारतीय नागरिक सुरक्षा संहिता 2023 अदालत ने घोषित अपराधियां री गैर मौजूदगी मांय ई मुकदमो चलावण री मंजूरी देवे है।

0000

राज्यपाल कलराज मिश्र कह्यो है के भणार्ई—लिखाई रो मतलब खुद ने जाण र सच रा गोला माथे चालणो है। वे आज बीकानेर मांय महाराजा गंगा सिंह विश्वविद्यालय रा 8 वां दीक्षांत समारोह मांय बोल रह्या हा। राज्यपाल कह्यो के दीक्षांत समारोह पाछे जिदंगी नुवा तरीका ऊं सरू व्हे है।

जळसा मांय साल 2021 मांय स्नातक अर स्नातकोत्तर री परीक्षा पास करण वाळा 1 लाख 26 हजार 880 विद्यार्थियां ने उपाधियां दे र नवाजी ज्या। शोध कार्य पूरो करण वाळा 39 विद्यार्थियां ने पीएचडी री उपाधियां अर ई साल रा इम्तेहान मांय अव्वल रेहवण वाळा 54 विद्यार्थियां ने सोना रा तमगा दे र नवाजी ज्या।

000000

रिजर्व बैंक रेपो रेट ने साढ़े 6 फीसदी रा लेवल माथे ई बणायी राखण रो फैसलो कीनो है। भारतीय रिजर्व बैंक रा गवर्नर शक्तिकांत दास आज मौद्रिक समिति री मीटिंग पाछे ओ ऐलाण कीनो। भारतीय रिजर्व बैंक लगातार आठवीं दफा ब्याज दरं मांय कोई बदलाव नी कीनो है। आर.बी.आई. रा गवर्नर देश री जी.डी.पी. री विकास दर 7 दशमलव 2 फीसदी रा लेवल माथे रेहवण रो भरोसो जतायो। आर.बी.आई. महंगाई री रेट ई साढ़े चार फीसदी रेहवण रा आसार जताया।

00000

चिकित्सा अर स्वास्थ्य मंत्री गजेन्द्र सिंह खीवसर नामी मसाला कम्पनियां रा असुरक्षित मिल्या मसाला तुरत सीज करण रा हुकम दीना है। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह बतायो के प्रदेशभर मांय चलायी ज्या खास अभियान रा तैत 93 नमूना लिया ज्या। राज्य केंद्रीय जनस्वास्थ्य प्रयोगशाला मांय करीजी जांच री रपट रे मुजब कुछ नमूनां मांय कीड़ा मारण री दवाइयां री बत्ती तादाद मिली ही। वे बतायो के कुछ मसाला बणावण रा कारखाना हरियाणा अर गुजरात मांय व्हेवण रे कारण वठे रा खाद्य सुरक्षा आयुक्तां अर भारतीय खाद्य सुरक्षा अर मानक प्राधिकरण, नई दिल्ली रा मुख्य कार्यकारी अधिकारी ने कार्रवाई सारू लिखी ज्यो है। खाद्य सुरक्षा आयुक्त इकबाल खान बतायो के जांच मांय एमडीएच, एवरेस्ट, गजानंद, श्याम, शीबा अर ताजा सरीखी नामी कंपनियां रा मसाला असुरक्षित मिल्या।

000000

प्रदेश मांय आज ई केई ठोड़ा आंधी चालण ऊं जिदंगी माथे असर पड्यो। जयपुर अर जयपुर ग्रामीण जिलां मांय संवारे ऊं ई धूळो उड़तो रह्यो अर कठे—कठे बिरखा व्ही। **भीलवाड़ा** जिला रा गुलाबपुरा हलका मांय आज सिंज्यां हल्की बारिश व्ही। **जोधपुर** ग्रामीण अर **चूरू** मांय दोपहरां पाछे आंधी चाली। **शाहपुरा** जिला रा फूलियाकलां

मांय ई आंधी चाली अर हल्की बारिश व्ही। **टोंक** मांय ई सिंज्या री पोर छांटो-छिड़को व्हयो। **बूंदी** रा आकोदा हलका मांय सिंज्यां री पोर चोखो मेह बरस्यो अर ज़िला मुख्यालय माथे ई बिरखा व्ही। ई बीचे **बूंदी** मांय चौमासा रे दौरान बाढ़ रे कारण जान-माल रा नुकसाण ऊं बचाव रा उपायां रा बारा मांय ज़िला कलेक्टर अहलकारां री मीटिंग ले र जरूरी हुकम दीना। वठै सिंज्या री पोर बिरखा व्ही। **पाली** मांय गर्मी ऊं बचाव सारू मंडिया रोड रा पेट्रोल पंप माथे जनता सारू फव्वारा लगायी ज्या अर लोगां ने कैरी री छाछ पायी ज्यी। मौसम महकमो जयपुर, टोंक, भीलवाडा, अलवर, दौसा, सवाईमाधोपुर, भरतपुर अर करौली जिला मांय कठे-कठे आंधी चालण अर हल्की बिरखा व्हेवण रा आसार जताया है। महकमो सीकर, झुंझुनू, अजमेर, धौलपुर, राजसमंद, उदयपुर, नागौर, जोधपुर, कोटा, बूंदी, बारां अर झालावाड़ जिलां मांय ई कठे-कठे आंधी अर बिरखा रा आसार जताया है।

0000

दौसा मांय विकसित राजस्थान 2047 रा बारा मांय कार्यशाला राख्यी ज्यी, जिण मांय जिला रा करीब 100 प्रगतिशील किसान सिरकत कीनी। कार्यशाला मांय न्यारा-न्यारा महकमां रा अहलकार आप-आप रा महकमा री योजनावां रा बारा मांय जाणकारी दीरीजी। ई मौके किसानां ने खेती सागे पशुपालन अर डेयरी हलका मांय ई नवाचार रा बारा मांय जाणकारी दीरीजी। भरतपुर मांय राख्यी ज्यी कार्यशाला मांय कृषि जोत री चकबंदी, बाजरा री सरकारी मोल माथे खरीदी, शहद रो सरकारी मोल तय करण, जैविक खेती करण वाळा किसानां ने सब्सिडी अर सहकारी समितियां रा बुनियादी ढांचा अर विकास सरीखा मुद्दां माथे चर्चा करीजी।

00000

राज्य सरकार उनाळा मांय गौशालावां सारू 1 करोड़ 40 लाख रुप्या रो और प्रावधान कीनो है। ई रकम ऊं गौशालावां मांय चारा-पाणी री बत्ती पूर्ति अर छाया री व्यवस्था करी जा सकेला। गौपालन विभाग री निदेशक शालिनी माथुर अजमेर मांय आ जाणकारी दीनी। वे अजमेर री पुष्कर घाटी, लोहार्गल अर नारेली गौशाला रो दौरो कीनो। पशुपालन उपनिदेशक बतायो के जिला मांय 36 गौशालावां ने सब्सिडी दी जा रही है। पाली जिला मांय ई 254 गौशालावां रो सर्वे करी ज्यो है, ज्यां मांय 88 हजार ऊं बत्ता गौवंश है। राज्य सरकार न्हाना गौवंश सारू 20 रुप्या अर मोटा गौवंश सारू 40 रुप्या रोजीना री रेट ऊं चारा-पानी बाबत चुकारो कर रही है।

00000

21 जून ने मनाया जावण वाळा विश्व योग दिवस री तैयारियां रा सिलसिला मांय प्रदेश मांय न्यारा-न्यारा कार्यक्रम राख्या जा रह्या है। **चूरू** रा अग्रसेन नगर मांय आज प्रशासन अर आयुर्वेद चिकित्सा विभाग री ओर ऊं योग पूर्वाभ्यास शिविर लगायी ज्यो, जिण मांय मोटी तादाद मांय जनता सिरकत कीनी। **बूंदी** मांय जिला कलेक्टर रा दफ्तर मांय योग दिवस, स्वास्थ्य जागरूकता संबंधी फोल्डर रो विमोचन करी ज्यो।

0000

सूचना अर प्रसारण मंत्रालय योग रा बारा मांय जाग जगावण सारू न्यारा-न्यारा कार्यक्रम राखेला।

0000